

X POVRAT SREDSTAVA KREDITA Neovisno o ugovorenim rokovima za otplatu kredita, kreditna sredstva odobrena i isplaćena u svrhu predfinansiranja projektnih aktivnosti i plaćanje PDV-a korisnik kredita dužan je vratiti Razvojnoj banci FBiH u roku od 30 dana od dana doznačavanja grant sredstava i povrata PDV-a. U slučaju neizvršavanja ugovornih obaveza, davanja lažnih podataka i nenamjenskog utroška kreditnih sredstava, Razvojna banka FBiH ima pravo raskinuti ugovor o kreditu i proglasiti kredit u cijelosti ili jedan njegov dio dospjelim i zatražiti prijevremeni povrat sredstava kredita.

XI SUBVENCIJA KAMATNE STOPE Vlada Federacije BiH subvencionira kamatu u visini do 2,50% godišnje, na kvartalnoj osnovi, metodom refundacije plaćene kamate. Pravo na subvencioniranje kamate ostvaruju svi korisnici kredita koji uredno izmiruju kreditne obaveze po odobrenim kreditima iz ove kreditne linije. Novčana sredstva za subvenciju kamate osiguravaju se u budžetu Federacije Bosne i Hercegovine u okviru pozicije Tekućih transfera drugim nivoima vlasti i fondovima- Subvencija kamata za sufinansiranje i predfinansiranje projekata lokalnih zajednica koje finansira EU i drugi donatori. Programom utroška sredstava sa navedene pozicije ili drugim odgovarajućim aktom Vlada Federacije BiH utvrđuje način isplate ovih sredstava i to putem automatizma, odnosno bez raspisivanja javnog poziva i podnošenja zahtjeva od strane korisnika kredita. Razvojna banka FBiH na kvartalnoj osnovi osigurava dokaz da je krajnji korisnik uredno izmirio dospjele anuitete za protekli kvartal prema otplatnom planu kredita sa obaveznim pregledom i ukupnim iznosom obračunatih i naplaćenih kamata za taj kvartal, vrši obračun iznosa kamate na koji korisnik ima pravo, te u roku od 15 dana od isteka svakog kvartala dostavlja Federalnom ministarstvu finansija-financija obavijest o iznosu potrebnih sredstava za subvenciju kamate za svakog korisnika kredita, sa potrebnim podacima za uplatu novčanih sredstava. U roku od 10 dana od dana prijema obavijesti od Razvojne banke FBiH, Federalno ministarstvo finansija-financija vrši prenos sredstava na račun korisnika kredita.

XII IZVJEŠTAVANJE Federalno ministarstvo finansija-financija će kvartalno izvještavati Razvojnu banku FBiH o izvršenim isplatama po osnovu subvencioniranja kamate, u roku od 15 dana od dana isplate sredstava korisnicima kredita. Razvojna banka FBiH će osigurati da se uspostavi adekvatan sistem koji omogućava monitoring i izvještavanje o svim značajnim informacijama o odobrenim kreditima, korištenju sredstava kredita, subvencioniranju kamate i uspješnosti provođenja ove kreditne linije. Razvojna banka FBiH će sačinjavati Godišnji izvještaj o provođenju ove kreditne linije, te isti dostavljati Savezu općina i gradova Federacije Bosne i Hercegovine i Federalnom ministarstvu finansija-financija najkasnije do 31. marta svake godine.

XIII VIDLJIVOST Svi korisnici kredita se obavezuju na svim printanim, video, elektronskim i drugim materijalima vezanim za provedbu projekta koji se finansira, te na svojim internet stranicama istaknuti logotip Razvojne banke FBiH, kao institucije koja finansira odnosni projekt.

XIV ODGOVORNOST ZA ŠTETU Savez općina i gradova Federacije Bosne i Hercegovine ne snosi odgovornost, bilo posrednu ili neposrednu, za eventualnu štetu proisteklu iz bilo koje aktivnosti korisnika kredita, Razvojne banke FBiH i Vlade Federacije Bosne i Hercegovine u vezi ove kreditne linije.

XV ZAVRŠNE ODREDBE Ovaj Priručnik stupa na snagu danom donošenja i bit će dostavljen svim članicama Saveza općina i gradova Federacije Bosne i Hercegovine, Federalnom ministarstvu finansija-financija i Razvojnoj banci FBiH.